

# Program dekati pelajar ceburi bidang kedokteran

CATATAN



LEBIH 100 peserta menghadiri Program Mendekati Perubatan Muslim 2015 (MMOP) di Sekolah Perubatan Yong Loo Lin, Universiti Nasional Singapura (NUS), Januari lalu.

Disokong Persatuan Karyawan Penjagaan Kesihatan Islam (MHPA), MMOP merupakan usaha pelajar yang dianjurkan buat lima tahun berturut-turut.

Program ini bertujuan antara lain mendekati pelajar dan menggalakkan mereka menyemai cita-cita menjadi doktor sebagai satu perkhidmatan kepada masyarakat.

Dalam sesi ini, terdapat pembentangan oleh penceramah jemputan dan stesen mencuba sendiri atau 'hands-on'.

Tahun ini, seramai tiga doktor dan tiga pelajar perubatan dijemput sebagai penceramah jemputan. Mereka berkongsi secebis pengalaman dalam bidang perubatan.

Penceramah jemputan, Dr Ibrahim Hanif, Dr Shaikh Shakoor dan Dr Jazlan Joosop, menyentuh tentang kehidupan masing-masing sebagai lulusan dan pengamal perubatan awam serta swasta.

Menurut Dr Jazlan, doktor boleh berkongsi pengalaman peribadi demi memberi gambaran kerjaya perubatan kepada para hadirin.

"Doktor boleh memberikan wawasan yang boleh dipercayai mengenai dunia perubatan sebagai kerjaya yang mulia dan dihormati kepada mereka yang bercita-cita menjadi doktor. Kami mengalu-alukan mereka menyertai fraterniti pengamal perubatan," kata Dr Jazlan.

Pelajar perubatan tahun akhir Universiti Queensland, Encik Md Fahamy Iskandar, pula menyentuh mengenai laluan ke luar negara.

"Adalah penting mendapatkan seberapa ramai yang tahu tentang cara lain untuk belajar perubatan, dan bantuan kewangan disediakan juga. Dengan ini, kami berharap lebih ramai anggota daripada masyarakat menyertai bidang perubatan," ujar Encik Md Fahamy.

Dalam acara yang sama, pelajar Sekolah Perubatan Yong Loo Lin juga berkongsi pandangan.

Encik Marcus Azizan mengetengahkan penglibatannya dalam Rag dan Pengeluaran Bendera 2014 - menerusi tarian tahunan mengucapkan terima kasih kepada warga Singapura atas sumbangan mereka.

Cik Nadia Azlan pula antara pelajar perubatan yang mengambil bahagian dalam projek kemanusiaan seperti Projek DAMAI, misi kemanusiaan perubatan ke Indonesia dengan kerjasama pelajar kejururawatan dan fakulti kesihatan lain.

Peserta juga berpeluang menyaksikan demonstrasi oleh fasilitator pelajar. Ini termasuk mengambil tekanan darah dan glukosa darah kapilari, serta pengkateteran ('catheterization') kencing dan proses mengeluarkan darah.

Peserta pula terdiri dari pelbagai latar belakang, termasuk pelajar madrasah dan politeknik. Sebahagian besar hadirin merangkumi pelajar maktab rendah dan pelajar sekolah menengah.

Presiden jawatankuasa penganjur tahun ini, Cik Syifa Azhar, berkata:

"MMOP berfungsi sebagai platform penting memberi inspirasi kepada pelajar prauniversiti dalam masyarakat kita. Kebanyakan peserta yang hadir adalah golongan muda. Diharap sesi perkongsian dan demonstrasi yang interaktif dan menarik ini dapat menarik minat mereka."

Ramai pelajar senior turut memberi sokongan dalam membantu meningkatkan keberkesanan jangkauan program ini. Antaranya ialah Encik Arif Uzair Mohamad Roslan, yang bertindak sebagai fasilitator stesen.

"Kami menggalakkan pelajar baru berkongsi pengalaman bersama kami menganjurkan acara sebelum ini. Ini boleh meningkatkan keberkesanan jangka panjang MMOP."

"Penyertaan dalam MMOP membolehkan kami menemui pelajar yang mungkin berminat dan akhirnya mungkin menjadi junior kami. Ini yang menjadikan MMOP istimewa," ujar Encik Arif.

Dalam pada itu, buku kecil program dihasilkan sebagai rujukan peserta.

"Buku kecil ini menjadi sumber renungan tentang apa maknanya memohon di fakulti perubatan. Kami percaya ia boleh terus menyediakan bantuan kepada peserta dan memberi mereka rujukan yang diperlu-

kan," kata Cik Sanaa Sheriff, yang merupakan pelajar perubatan NUS.

Jawatankuasa menggunakan media sosial seperti Facebook untuk mendekati seberapa ramai peserta mungkin.

Di samping itu, liputan media oleh *Berita Harian* membantu memperluas usaha kami.

"Usaha publisiti sebegini penting demi kejayaan MMOP," kata Cik Nur Aisyah Mohamed Yusri, juga pelajar perubatan.

Pelajar perubatan berharap MMOP 2015 berkesan dalam meningkatkan minat pelajar memohon bidang perubatan.

"Kami berharap MMOP mampu memainkan peranan mendekati pelajar agar memilih bidang perubatan," kata pelajar bidang tersebut, Cik Noor Ahmed Alkaff.

Sebagai usaha menyokong program jangkauannya, jawatankuasa MMOP turut menganjurkan program belajar sambil bekerja atau 'internship' di hospital dan klinik tempatan.

Hampir semua peserta yang menghadiri program ini menunjukkan minat menyertai program itu.

Tempoh latihan berlangsung pada Januari dan Mac.

Pembaca yang berminat menjadi hos pelajar menjalani program latihan pelajar boleh menghubungi jawatankuasa penganjur menerusi e-mel [medicineoutreach2015@gmail.com](mailto:medicineoutreach2015@gmail.com).

► Penulis mahasiswa tahun pertama Sekolah Perubatan Yong Loo Lin, Universiti Nasional Singapura (NUS).



**KENALI DUNIA PERUBATAN:** Inilah barisan siswa perubatan Sekolah Perubatan Yong Loo Lin, Universiti Nasional Singapura, yang membantu mengenalkan dunia perubatan kepada pelajar yang berminat. - Foto-foto ihsan MUHAMMAD NUR DINIE ABDUL AZIZ



**HAYATI SELOK-BELOK DUNIA DOKTOR:** Para pelajar didedahkan kepada dunia perubatan menerusi sesi amali atau 'hands-on'.